



Selskapsavtale for Hardangerrådet iks

Godkjent 22.10.2020.

KAPITTEL 1

FØREMÅL OG LOKALISERING

§ 1 Selskapet sitt namn, føremål og føresetnader

Selskapet sitt namn er Hardangerrådet iks

Hardangerrådet iks er eit interkommunalt selskap, oppretta med heimel i lov om interkommunale selskap av 29.01.1999 nr 6, med kommunane Eidfjord, Kvam, Ullensvang og Ulvik som medlemmar.


Hovudoppgåva er å styrkja regionen gjennom større grad av forpliktande samarbeid.

Samarbeidet skal leggja til grunn deltaking frå likeverdige partar og skal vera eit supplement og ei støtte til kommunane si eiga verksemd.

§ 2 Målsetjingar

Hovudmålet med det interkommunale samarbeidet er:

1. Å bygga ein sterk region med samhandling, løysingar og nettverk på tvers av kommunane.
2. Å vera eit strategisk organ for Hardanger og bidra til ei berekraftig utvikling og styrking av regionen på ulike arenaer gjennom å ha ei nøkkelrolle i forhold til regional fornying, innovasjon og omstilling.
3. Å driva regional utvikling med fokus på breie og opne prosessar utøvd på tvers av sektorar, oppgåver og nettverk.
4. Å utvikla regionen gjennom samarbeid mellom kommunane med fokus på identitet, attraktivitet, næring, kompetanse, skule og helse.
5. Å gje felles fråsegner på vegne av kommunane overfor fylke, sentrale styresmakter og andre i saker der dette er naturleg.
6. Å samarbeida med andre regionråd og driva aktiv distriktpolitisk arbeid for å fremja viktige regionale saker, både internt men også overfor styresmakter på fylkes- og statleg nivå.
7. Hardangerrådet skal i si verksemd utgjera ein meirverdi for medlemskommunane i høve til å forsterka interessene deira inn mot regionale og sentrale styresmakter



§ 3 Lokalisering

Selskapet har hovudkontoret sitt i Kinsarvik.

KAPITTEL 2

ORGANISERING OG STYRING

§ 4 Eigar- og ansvarsdel.

Selskapet hadde ved stiftinga innskotskapital på 100.000 kroner.

Kommunane sin eigar- og ansvarsdel i selskapet er fastlagd slik:

Eidfjord	11%
Kvam	34%
Ullensvang	44%
Ulvik	11%
SUM	100%

Eigar- og ansvarsdel over er basert på at 30% av totalkontingent er fordelt likt mellom medlemskommunane og 70% er fordelt etter folketal.

Eigardelen og deltakaransvaret kan justerast kvart 4. år i samsvar med endringane i folketalsutviklinga i kommunane, første gong pr 01.01.2025. Slik justering krev endring i selskapsavtalen.

Kommunane heftar uavgrensa for sin prosentdel av selskapet sine plikter.

§ 5 Organisasjon

Hardangerrådet iks sine organ er representantskapet, styret, dagleg leiar og klagenemnd. Hardangtinget, Hardangerrådet, Rådmannsforum, Team Hardanger, Hardanger Ungdomsråd og Hardanger Kulturråd er politiske og administrative einingar som Hardangerrådet IKS har utøvande sekretærfunksjon for.

§ 6 Representantskap.

Representantskapet er selskapet sitt øvste organ. Representantskapet er til ei kvar tid medlemmene i regionrådet. Representantskapet skal sjå til at selskapet vert drive etter føremålet i samsvar med lover og denne selskapsavtalen.

Dagleg leiar og styreleiar tek del i møta i representantskapet med tale- og framleggsrett. Styreleiar har møteplikt jfr. IKS-lov §9 6. ledd.

Representantskapet skal halda minst 1 møte i året. Dette møtet er årsmøte for Hardangerrådet iks. Andre møter følgjer IKS-lov §8, med unntak av at innkalling til møte følgjer møteplan for regionrådet. Sakliste framgår av sakliste til møte i regionrådet, spesifisert kva saker som gjeld representantskapet.

Saker etter Lov om IKS skal meldast med 4 veker frist.

Årsmøte:

Årsmøte i Hardangerrådet iks skal haldast innan utgangen av april og er vedtaksført når minst 3 av kommunane er representerte med ordførar eller varaordførar.

Årsmøtet skal handsama saker i tråd med lov og denne selskapsavtalen:

1. godkjenna årsmelding
2. godkjenna revidert rekneskap for siste år
3. godkjenna budsjettet for komande år
4. godkjenna arbeidsplan
5. godkjenna den 4-årig økonomiplanen
6. velja styre med varamedlemmer
7. velja styreleiar og nestleiar i styret
8. velja rekneskapsførar og revisor
9. handsama andre saker som styret har lagt fram
10. avgjera fullmakter til styret
11. fastsetja godtgjersle til styret

Sakshandsaming og avstemmingar følgjer av IKS-lov §9.

§ 7 Regionrådet

Regionrådet er samansett av ordførarane i eigarkommunane med varaordførar som personleg vararepresentant. Det er høve til å møta i regionrådet med fullmakt frå kommunen/heradet.

Regionrådet vel sjølv rådsordførar og rådsvaraordførar for to år om gongen.

Det skal haldast minst 4 møte i regionrådet kvart år. Det eine møtet skal haldast innan utgangen av april og skal vere årsmøte.

Regionrådet er vedtaksført når minst 3 av kommunane er til stades. Kvar medlemskommune har 1 røyst i rådet. Ved røystelikskep er leiaren si røyst avgjerande.

Rådsordføraren kan kalla inn andre til møta når han/ho finn det føremålstenleg for sakshandsaminga. Desse kan gje opplysningar og utgreiingar, men har elles ikkje høve til å ta del i drøftingane.

Rådet skal ta initiativ til å fremja intensjonane i §§ 1-2 og til å drøfta saker av sams interesse.

Regionrådet er samordningsinstans for dei utvala og aktivitetane som regionrådet femner om. Rådet kan på einskildområde setja ned eigne rådgjevande fagutval.

Regionrådet har møte etter ein oppsett årleg møteplan eller når rådsordførar eller 2 av kommunane krev det. Rådsordførar kallar inn regionrådet etter den fastlagde møteplanen som er å sjå på som innkalling til møte innafor 4 vekersfristen i lov om IKS. Møteplanen kan fråvikast når det er semje i regionrådet om det.

Sakliste til kvart møte vert sett opp av rådsordførar. Regionrådet sjølv avgjer å ta opp saker som ikkje kan venta til neste møte.

§ 8 Styre.

Styret i Hardangerrådet iks skal vera samansett av 3 personar med 2 varamedlemmer. Styret vert valde av representantskapet, og for 2 år om gongen. Varamedlemmer vert valde for eitt år om gongen. Styret er vedtaksført når 2 medlemmer er til stades. Styreleiar kallar inn til møta og set dagsorden.

Styret skal sjå til at selskapet vert drive etter lover og denne selskapsavtalen. Styret skal sørjia for ein forsvarleg formuesforvaltning og føra tilsyn med dagleg leiar.

Rådsordførar har møte- og talerett i styremøter

Dagleg leiar er sekretær for styret.

§ 9 Hardingtinget

Hardingtinget er eit samarbeidsorgan i regionrådet og er samansett av formannskapa i eigarkommunane. Hardingtinget skal haldast minst 1 gong i året. Rådsordførar er leiar i Hardingtinget med rådsvaraordførar som nestleiar.

§ 10 Dagleg leiar

Selskapet skal ha ein dagleg leiar som har ansvaret for dagleg leiing i tråd med § 14 i Lov om IKS. Styret tilset dagleg leiar.

Styreleiar utøver arbeidsgjevarfunksjonen overfor dagleg leiar.

Dagleg leiar sine oppgåver:

- Ansvarleg for dagleg drift, personale og budsjett/rekneskap for heile organisasjonen.
- Hovudansvaret for informasjonsstrategien i organisasjonen.
- Sekretær for representantskapet, styret og regionrådet, og i andre utval tilhøyrande regionrådet.
- Samordna arbeidet og førebu saker til regionrådet og styret.
- Setja i verk vedtak fatta av regionrådet og styret.
- Ansvarleg for oppfølging av utviklingsplan, tiltaksarbeid og prosjektarbeid.

§ 11 Arbeidsgjevarfunksjonen

Styret har arbeidsgjevaransvaret for alt personale tilsett i rådet. Dagleg leiar utøver den daglege arbeidsgjevarfunksjonen på vegne av styret.

§ 12 Budsjett/driftsutgifter

Representantskapet vedtek innstilling om neste års budsjett som vert sendt til kommunane innan utgangen av august månad. Representantskapet er budsjettansvarleg.

Representantskapet har fullmakt til å føreta budsjettreguleringar innanfor vedteke budsjett og til å styrke budsjettet ved bruk av inntekter ut over det budsjetterte. Representantskapet kan gje budsjettfullmakter til styret. (Jfr. IKS-lov §18)

Hardangerrådet iks sitt budsjett skal dekkja:

- Dagleg drift
- Finansiering av prosjekt/tiltak i regionen. Rådet kan ikkje setja i gang tiltak som fører med seg større økonomiske plikter enn det inntektene gjev grunnlag for.
- For store prosjekt skal det utarbeidast eigne budsjett, som skal godkjennast av rådet og kommunane/herada dersom det ikkje er dekning på rådet sitt budsjett.

Reiseutgifter og anna godtgjersle for kommunale representantar i regionrådet sine organ og i prosjektarbeid vert dekkja av den einskilde kommune, dersom anna ikkje er avtala.

Reiseutgifter og godtgjersle til styret og andre vert dekkja av Hardangerrådet iks, etter staten sine satsar.

§ 13 Selskapet sin representasjon.

Styret representerer selskapet utad og teiknar firmaet.

Styret kan gje rådsordførar og/eller dagleg leiar rett til å teikna selskapets firma.

Dagleg leiar representerer selskapet utad i saker som fell under myndet etter Lov om IKS § 14.

KAPITTEL 3

SAKSHANDSAMINGSREGLAR OG KOMMUNANE SINE PLIKTER

§ 14 Selskapet si klagenemnd

Klage i enkeltvedtak i Hardangerrådet iks vert avgjorde av ei klagenemnd samansett av leiar/medlem i klagenemnd/klageorgan i dei 4 eigarkommunane. Funksjonane som leiar og nestleiar i klagenemnda følgjer perioden og kommunen/heradet som til ei kvar tid har rådsordførar og rådsvaraordførar.

§ 15 Sakshandsaming

Hardangerrådet iks følgjer sakshandsamingsreglane i samsvar med føresegnene i kommunelova kapittel 6 - sakshandsaming i folkevalde organ.

§ 16 Økonomi/finansiering

Selskapet fører rekneskap etter rekneskapslova.

Representantskapet vel revisor. (Jfr. IKS-lov §28)

Selskapet sitt årsbudsjett vert sett opp slik at det gir eit realistisk bilete av drifta av verksemda. Deltakarkommunane forpliktar seg til å gje tilskot til selskapet etter eigarandelane i denne selskapsavtalen. Årsbudsjettet er endeleg når kommunane har gjort vedtak om tilskot etter kommunelova § 45 nr 4.

Tilskot frå kommunane vert å betala i to terminar à 50%, 15. januar og 15. juni

Selskapet kan ikkje ta opp lån frå andre enn eigarkommunane.

Selskapet kan ikkje stilla garanti eller pantsetja eigedeler.

KAPITTEL 4

GYLDIG SELSKAPSAVTALE

§ 17

Hardangerrådet iks sin selskapsavtale er gyldig når han er godkjend av kommune-/heradstyra i dei 4 deltakarkommunane. Endring av avtalen som gjeld forhold som omtalt i Lov om IKS § 4, tredje ledd, skal skje på same måte. Andre endringar vert gjort av Representantskapet i tråd med Lov om IKS § 4 andre ledd, andre punktum.

KAPITTEL 5

UTMELDING/OPPLØYSING

§ 18 Utmelding

Den einskilde deltakarkommune kan med eit års skriftleg varsel seia opp sitt deltakartilhøve i Hardangerrådet iks i tråd med Lov IKS § 30.

Oppseiingsfristen på eitt år gjeld frå 31.12. det året oppseiinga finn stad. Kommunar som melder seg ut, har plikt til å betala deltakartilskot inntil utmeldinga er effektiv.

Utmeldt kommune heftar for framtidige pensjonsforpliktingar i samsvar med eigar- og ansvarsdel i selskapet.

§ 19 Oppløysing

Hardangerrådet iks kan oppløysast når deltakarkommunane er samde om det, jf Lov om IKS §32 og det er gjort vedtak i alle deltakarkommunane. Oppløysing skal handsamast i representantskapet. Møte i representantskapet må kallast saman med ein frist på 12 månader og 3 av medlemmane må vera tilstades. Styret i selskapet er avviklingsstyre i oppløysingsåret. Kommunane heftar for framtidige pensjonsforpliktingar i samsvar med eigar- og ansvarsdel i selskapet.

Oppløysing av Hardangerrådet iks må godkjennast av departementet.

Vedteke:

Eidfjord kommunestyre	xx.yy.2020 Ordførar
Kvam heradstyre	xx.yy.2020 Ordførar
Ullensvang kommunestyre	xx.yy.2020 Ordførar
Ulvik heradstyre	xx.yy.2020 Ordførar